

REDAKSIONEEL

SKRIFGESAG, GES EN GEREFORMEERDE GELOOF

Artikels in hierdie uitgawe raak die kerklike problematiek van ons tyd. Ons publiseer graag die waardevolle studie van prof. Velema oor die rapport van die GKN oor Skrifgesag. Hierdie rapport is die sleutel waarmee vasgeloopde probleme in die GKN rondom prof. H. Kuitert so wel as die besluit om diskriminasie teenoor praktiserende homoseksueles op te hef, ontsluit moet word. Waar hierdie probleme die afgelope GES te Nimes ook besig gehou het, sal die inhoud ook uitkring na die GES kerke.

In die lig daarvan kom die artikel oor die GES self ook in ons gesigsveld. Uiteraard kan nie alle aspekte van die GES aandag geniet nie en is die positiewe waarde van die GES miskien die moeilikste om uit objektiewe bronne daar te stel. Die waarde wat onderlinge ontmoeting en verkeer vir gereformeerdes oor die hele wêreld het, kan gekonstateer maar moeilik gemeet word. Die artikel vestig aandag op probleme, anomalië en ook krisis wat die toneel toenemend beroer. Daarin speel die GKN 'n duidelike dirigerende rol.

'n Artikel van prof. M. A. Kruger sny moontlike en daadwerklike teologiese verskille en vraagtekens in eie geleedere aan. Dit verwys na gepubliseerde standpunte en stellings wat in ander publikasies na vore getree het. Die kolomme van *In die Skriflig* staan oop vir opbouende diskussie waarin die aksent op die saak en nie op persone nie saamtrek.

TYDSKRIFOORSIG

Op wetenskaplike gebied het die tydskrif een van die belangrikste bronne van inligting geword. Dit bied stof, literatuurverwysings en is meer dinamies en op datum as boeke. Tog doen die kenmerk hom in baie teologiese artikels voor dat literatuur net „skools” geraadpleeg word. Teoloë van 'n bepaalde skool in S.A. sal nie kennis neem van teologiese arbeid in 'n ander „skool” nie. Prof. J. H. (Amie) van Wyk het gevolglik die wenk aan die hand gedoen dat *In die Skriflig* minstens uit die inhoudsgawes van teologiese tydskrifte wat in S.A. verskyn en as ruilnommers gestuur word, selekteer en publiseer. Die ideaal sou wees indien waardevolle artikels miskien ook geresenseer kon word. Prof. Van Wyk het goedgunstig onderneem om so 'n publikasie van tydskrifvoorsigte te versorg. In hierdie uitgawe verskyn 'n eerste, hoewel nog onkomplete poging.

VERSLAG VAN DIE GTV JAARVERGADERING

Ds. A. J. du Plessis lewer die volgende verslag van die GTV-jaarvergadering op 9 Junie vanjaar in die Ararat Jeugsentrum:

Die presensielys is deur 186 predikante, professore, proponente en teologiese studente van ons twee Skole onderteken. Die goeie opkoms en entoesiastiese bespreking moet aan die belangrikheid van die tema, *die goddelike verkiesing*, toegeskrywe word. Die twee

2 *In die Skriflig*

referente het prikkelend gepraat. Ons hoop dat beide voordragte vir publikasie in die volgende uitgawe gereed sal wees waarna die stof weer rustig herkou kan word. Prof. Christi Coetzee het oor die goddelike verkiesing in die N.T. en prof. Koos van Rooy meer oor die sekerheidsaspek t.o.v. die verkiesing gepraat. Nadruk in die voordragte en bespreking het geval op die vastheid van Gods heilswerk sonder dat dit met menslike deterministiese begrippe gevul kan word.

Die Hoofbestuur en Gereformeerde Stigting te Pretoria-Oos verdien dank vir die keuse van tema, vergaderplek en ontvangs.

IN DIE SKRIFLIG

Drukkoste het die afgelope 4 jaar met 44% gestyg. Daarby is etlike uitgawes groter as die gewone 64 bladsye gemaak. Die intekenaarstal is tans 359 terwyl 425 kopieë gedruk word omdat die tydskrif as ruilnommer en gratis aan biblioteke versprei word. Intekengeld betaal dus net vir 1½ nommer per jaar. Die voorhande fondse kan die blad net tot einde 1981 finansier. Verhoging van intekengeld vir 1982 mag noodsaaklik word.

Die Hoofbestuur doen andermaal 'n beroep op predikante om intekenaars te werf onder die lidmate wat die inhoud kan waardeer, ruim donasies by plaaslike kerke aan te beveel en om *In die Skriflig* 'n vaste plek op die jaarlikse begroting van die kerkraad te gee. Uitbou en uitdra van die gereformeerde teologie en praktyk is tog koninkrykwerk by uitnemendheid.

Die finansies van die Hoofbestuur is gesond sodat slegs die bedrag van een jaar uit die fondse van *In die Skriflig* oorbetaal is.

VOLGENDE JAARVERGADERING

Die Hoofbestuur het opdrag ontvang om oor twee jaar die volgende saamtrek te reël en ondertussen die statute met die oog op vernuwing te hersien. Die krag van die GTV lê egter nog steeds plaaslik. Die Hoofbestuur versoek plaaslike GTV's en individuele lede om met die sekretaris (ds. A. J. du Plessis) te skakel en voorstelle m.b.t. onderwerpe en sprekers vir die tweejaarlikse „jaar”-vergaderings te doen.

FINANSIELE STATE GTV HOOFBESTUUR

1 OKTOBER 1980 — 31 MEI 1981

1. LOPENDE REKENING

Saldo op 30 September 1980		R 7,86
Inkomste		R50,00
Inbetaling vanaf Spaarrekening	R50,00	
		R57,86
Uitgawes		R59,40
Reiskoste hoofbestuursvergadering		
J. M. Vorster	R16,80	
M. Venter	R 8,40	
A. J. du Plessis	R31,20	
Tjekboek	R 3,00	
Nadelige saldo op 31 Mei 1981		R 1,54

2. SPAARREKENING

Saldo op 30 September 1980		R242,56
Inkomste		R305,14
Van „In die Skriflig”	R300,00	
Rente	R 5,14	
Uitgawes		R 73,26
Onttrekking vir lopende rekening	R 50,00	
Administratiewe koste jaarvergadering	R 23,26	
Saldo op 31 Mei 1981		R474,44
A. J. DU PLESSIS		
Sekretaris-penningmeester		